

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- उपराज्यपाल मनोज सिन्हा होरे आखेआ ऐ जे जम्मू-कश्मीर दा भविक्ख नौजवानें दे हत्थै च ऐ ते सरकारै नौजवानें दे सशक्तिकरण ते उंदे सुखने गी मूर्त रूप देने च सहयोग गितै पक्का धेइया कीते दा ऐ।
- 2- मुखमंत्रि उमर अब्दुल्ला होरें जम्मू-कश्मीर दे उद्यौगिक क्षेत्र च नमें सिरेआ जान भरने दे धेइयै गी फही पक्का कीता।
- 3- जम्मू-कश्मीर सरकारै अपने कम्में ते स्कीमें दी असरदार अमल आवरी यकीनी बनाने लेई अपने मंत्रिएं गी 4-4 जिले दी जुम्मेवारी सौंपी ऐ।
- 4 जम्मू दे डिविजनल कमीशनर होरें औंदे गणतंत्र दिवस गितै तैयारिएं दा जायजा लैता।
- 5 मस्कट च खेड्डी जा'रदी महिलाएं दे जूनियर एशिया कप हॉकी प्रतियोगिता दे मैच च भारत नै मलेशिया गी 5-0 कन्नै हराया।

<><><><><><>

LG-Youth

उपराज्यपाल मनोज सिन्हा होरें आखेआ ऐ जे जम्मू-कश्मीर दा भविक्ख एहदे नौजवान तैह करंगन ते सरकार दे सब्बै सीगे ते अंग नौजवानें गी सशक्त बनाने ते उनेंगी उंदे सुखने साकार

करने च मार्गदर्शन ते सहयोग देने लेई पूरी चाल्ली तैयार न। एल.जी होरें आखेआ जे असें बच्चें
गी ज्ञान, दलेरी, दया, हमदर्दी, बलिदान ते निस्वार्थ सेवा जनेए गुणें राएं उंदा शारीरिक,
मानसिक, नैतिक ते बौद्धिक विकास राएं उंदे पूरे-पराते व्यक्तित्व गी नखारना लोइचदा ऐ।
मनोज सिन्हा होर कल राजभवन जम्मू च श्री कैलख ज्योतिष ते वैदिक संस्थान ट्रस्ट दी
सलाना पत्रिका “कर्तव्य मार्ग” दे त्रीए संस्करण गी जारी करने मौके बोला करदे हे। उनें जम्मू-
कश्मीर च संस्कृत भाषा ते प्राचीन ज्ञान पद्धति दे उच्च म्यार दे अनुसंधान गी बढ़ावा देने लेई
श्री कैलख ज्योतिष ते वैदिक संस्थान दे जत्नें दी सिफ्त कीती।

<><><><><><>

CM-Industry

मुख्यमंत्री उमर अब्दुल्ला होरें कल मकामी उद्योगें गी इसलै पेश औने आहली चुनौतियें गी दूर
करने च मदाद देने दी अपनी सरकार दी प्रतिबद्धता गी दोहराया। एह गल्ल उनें जम्मू “चैंबर
ऑफ कामर्स एंड इंडस्ट्री” आसेआ अपने दफ्तर च आयोजित इक कार्यक्रम दौरान आक्खी। उमर
होरेंगी इस कार्यक्रम च जम्मू-कश्मीर दे मुख्यमंत्री दे तौरा पर पदभार साम्भने लेई सम्मानित
बी कीता गेआ। जम्मू दी सैलसफा छमता बारै बोलदे होई उनें आखेआ जे हर बरे माता वैष्णो
देवी जी दे दर्शनें लेई 1 करोड़ शा मते तीर्थ यात्रु जम्मू औंदे न जेकर अस्स उंदे चा 15 फीसदी
गी बी सफलतापूर्वक मकामी सैलानी थाहरें बक्खी मोड़ी सकगे ते असेंगी फौरन 15 लक्ख
सैलानियें दा फैयदा होग।

<><><><><><>

Vaishno-Devi

श्री माता वैष्णो देवी जी दे दर्शन करने औने आहले यात्रुएं दा आंकड़ा 2022 दे बाद लगातार त्रै बरें च 90 लकख कोलां पार होई गेआ ऐ। श्री माता वैष्णो देवी श्राइन बोर्ड दे मुख् कार्जकारी अफसर अंशुल गर्ग होरें दस्सेआ जे मते प्रोजेक्ट्स न जेडदये 2025 तककर पूरे होई जाने न ते जेदे कन्नै यात्रुएं गी माता रानी दे दर्शन करने च होर मती सखाल होई जाग। माता रानी दा एह पवित्तर दरबार हिंदुएं लेई आस्था दा केंद्र ऐ ते भारत दा इक मन्ने-परमन्ने दा तीर्थ स्थान ऐ।

<><><><><><>

PITEX-Amritsar

अमृतसर च 5 दिसंबर कोला लेइयै 9 दिसंबर 2024 तगर आयोजित 18में पंजाब अंतरराष्ट्रीय बपार एकपो मेले च जम्मू-कश्मीर दा पंडाल आकर्षण दा केंद्र बने दा रेआ। जेएण्डके ट्रेड प्रमोशन आर्गनाइजेशन JKTPO आसेआ लाए ते प्रायोजित कीते गेदे इस पंडाल च जम्मू-कश्मीर दी रिवायती कला, कारीगिरी, देसी ते अस्सली उत्पाद, उभरदी उद्यमता समर्था दी इस बपार एकसपो च औने आहले रज्जियै सिफती कीती। इस मेले च 4 लकख कोला मते लोकें शिरकत कीती ते उत्थे रक्खे गेदे उत्पादें गी दिक्खेआ, खरीदेआ ते इंदे च बपार कारोबरा लेई अग्गे आए। जम्मू-कश्मीर दे पंडाल च जम्मू प्रांतै थमां बसोहली पश्मीना दे शाल, कान्नी ते सोजनी कढ़ाई आहले कपड़े गी लोकें बड़ी मती दिलचस्पी दस्सी। इस दौरान 1 करोड़ रपे कोला मती विक्री दे अलावा इनें उत्पादें लेई केई आर्डर ते करार बी होए जिंदे नै इनें कारीगरें ते उद्यमिणं दे कम्म-कारोबार गी मता बढ़ावा थहोग।

<><><><><><>

Minister-Districts

जम्मू-कश्मीर सरकार नै इक महत्व पूर्ण फैसला लेंदे होई अपने मंत्रिं गी जिले लाट कीते न जित्थे ओह विकास कार्यक्रमें दी असरदार अमल आवरी यकीनी बनाने लेई लोकें कन्नै नेड़मा तालमेल बठाइयै ते सार्वजनिक सेवाएं दी दस्तयाबी पर नेड़मी तक्क रखदे कम्म करडन। सरकार आसेआ जारी हुकमै मूजब उपमुख्यमंत्री सुरिंद्र कुमार चौधरी होर जम्मू, पुंछ, अनंतनाग ते शोपियां जिलें, मंत्री जावेद अहमद राणा होर डोडा, राजौरी, पुलवामा ते बारामूला जिलें, सकीना मसूद, इतू, कुपवाड़ा, श्रीनगर, कठुआ ते साम्बा ते जावेद अहमद डार गांदरबल, बडगाम, किश्तवाड़ ते रामबन, सतीश शर्मा होर उधमपुर, रियासी, कुलगात ते बांडीपोरा जिले दी जुम्मेवारी साम्भडन। मंत्रिं गी बक्ख-बक्ख जिलें दा जिम्मा सौंपने दा मकसद सरकार दिएं सब्भनै पैहलकदमिं दा असर ते फैयदा पूरे प्रदेश च भलेआं जमीनी सतह तगर पुजाना यकीनी बनाना ऐ।

<><><><><><>

Smart-India Hackathon Jammu

आई.आई.टी जम्मू कल्लै थमां शुरू होआरदे स्मार्ट इंडिया हैकाथॉन 2024 दे साफ्टवेयर संस्करण दी मेजबानी गितै तैयार ऐ। मुख्य भरै थमां कुल 30 टीमां साइबर सुरक्षा सरबन्धी चुनौतियें कन्नै निब्बड़ने गितै उपास लेइयै औने दी मकाबलेबाजी च शिकरत करै करदे न जिंदे च आई.आई.टी जम्मू दियां त्रै टीमां बी शामिल न। कुल भारत सतह दे नववाचार गी बढ़ावा देने आहले इस हैकाथॉन दा एह 7मां संस्करण ऐ जेड़ा कल मुख्य दे 51 प्रमुख नोडल केंद्रें पर शुरू होग जेदे च आई.आई.टी जम्मू च इक मुख मेजबान दी भूमिका निभाग। कार्यक्रम दा उद्घाटन शिक्षा मंत्री धर्मेन्द्र प्रधान होर वर्चुअल ढंगगै नै करंगन। इस बारै तफसीली जानकारी देआरदे न आकाशवाणी दे जम्मू संवाददाता एन. गुलशन रैणा।

<><><><><><>

Dic-Com Jammu

जम्मू दे डिविजनल कमिशनर रमेश कुमार होरें जम्मू जोन दे अडिशनलर ड्रैक्टर जनरल ऑफ पोलीस आनंद जैन हुंदे कन्नै कल गणतंत्र दिवस 2025 दी तैयारियें दी समीक्षा कीती। आकाशवाणी जम्मू दे संवाददाता दी रिपोर्ट मूजब इस बैठक च मैहकमे दे प्रधानें ते हितधारकें हिस्सा लैता इस दौरान परेड करने आहली टुकड़ियें दा चयन सांस्कृतिक कार्यक्रम, कार्यक्रम आहली थाहर पर सुविधा, बगैरा पर चर्चा कीती गई डिवकाम होरें मैहकमे दे प्रधानें गी बी निर्देश दिता जे ओह अपने-अपने मैहकमें दे नोडल अफसरें गी नियुक्त करन तां जे सारा कम्म सेही तरीके कन्नै होए ते उसी खीरी रूप दिता जाई सकै।

<><><><><><>

Javed Rana Education

जनजातीय मामले, चपासम, जल शक्ति, जंगलात ते पर्यावरण मंत्री जावेद अहमद राणा होरें शिक्षा दे क्षेत्र गी उमर अब्दुल्ला हुंदी अगुवाई आहली सरकार दी सब्बनें शा अव्वल तरजीहें च शामिल दस्सदे होई आखेआ ऐ जे सरकार दा मुंडला लक्ष्य चिंता ते जिम्मेदारी हर बच्चे लेई म्यारी शिक्षा तगर सखल्ली पुज्ज गी यकीनी बनाना ऐ जित्थे उनेंगी अज्जै-कल्लै दे ढंग्गै दियां सारियां सुविधां बी उपलब्ध होन। कल जम्मू च ब्रिगेडियर के.वी पब्लिक स्कूल दे सलाना उत्सव च बतौर मुख परोहने शिरकत करदे होई राणा होरें आखेआ जे असें समाज दे सब्बनें वर्ग कन्नै लेइयै अगड़े बधने दा पक्का निश्चा कीते दा ऐ। मंत्री होरें आखेआ जे स्हाड़ियें कोश्टें दा आधार सब्बनें गी किट्ठे ते कन्नै लेइयै जम्मू-कश्मीर गी सनैहरी भविक्ख बक्खी अगड़े लेई

जाना ऐ जेड़ा इक मजबूत ते इकजुट मुल्ख दे निर्माण च योगदान देग। इस मौके स्कूलै दे बच्चें शानदार रंगारंग सांस्कृतिक कार्यक्रम बी पेश कीते। साबका मंत्री ताज मोहिउद्दीन, गुर्जर देश चैरीटेबल ट्रस्ट दे चेयरमैन अर्शद अली चौधरी, जम्मू-कश्मीर स्कूली शिक्षा बोर्ड दे चेयरमैन परीक्षित सिंह ते होर कई लोक बी इस मौके मजूद हे।

<><><><><><>

Soldier-Poonch

कल पुंछ जिले दे साब्जियां सैक्टर दे Thanedar Tejri इलाके च गश्त दे दौरान बरूदी सुरंग फट्टने करी 25 राश्ट्रीय राइफल्स दा इक सेना हवलदार शहीद होई गेआ। शहीद दी पंछान हवलदार वी. सुबैया वैरीकुंटा दे नांs कन्नै होई ऐ जेड़ा गश्त दल दी अगुवाई करा'रदा हा ते गश्त दौरान उंदा पैर बरूदी सुरंग उप्पर रखोई जाने करी धमाका होई गेआ। हादसे दे बाद उनेंगी फौरन अस्पताल पजाया गेआ जित्थे उनेंगी मृत घोषित करी दिता गेआ। नगरोटा दी व्हाईट नाईट कार्प्स जिसी 16 कार्प्स बी आखेआ जंदा ऐ, नै शहीद गी श्रद्धांजलि अर्पित कीती। उपराज्यपाल मनोज सिन्हा होरें बी शहीद हए दे हवलदार वी. सुबैया वैरीकुंटा होरें गी भावभीनी श्रद्धांजलि भेंट कीती। उनें आखेआ जे पूरा देश शहीद दे परोआर कन्नै इस दुख दी घड़ी च खड़ोते दा ऐ।

<><><><><><>

Malaysia

ओमान दे मस्कट च महिलाएं दी जूनियर एशिया कप हॉकी प्रतियोगिता च भारत नै मलेशिया गी 5-0 कन्नै हराइए अपना शानदार प्रदर्शन जारी रक्खेआ ऐ। इस प्रतियोगिता दे इतिहास च

मलेशिया खलाफ भारत दी एह लगातार त्रीऽ जित ही। मट्ठी रफ्तार ते मलेशिया दी मजबूत रक्षा पंक्ति दे बावजूद खेड़ दे त्रीए क्वार्टर च भ्दारतीय टीम नै कामयाबी हासिल कीती।

<><><><><><>